

Boux Vunz Hawj Gou Gamjdoengh Ndeu

一个让我感动的人

贵港市覃塘区蒙公乡高占小学 六(2)班 韦飞扬



Youq ndaw ngoenznaengz gwn-daenj, miz haujlai vunz haujlai saeh hawj gou gamjdoengh, cei q hawj gou gamjdoengh dwg daegnuengx dwg-gyaez ndeu.

Ngoenzhaenx, gou caeuq daxmeh cingq youq ndaw cicamh caj ci. Sawqmwh yawjraen baenz bang vunz comz baenz doi ndeu, mbouj rox fatseng gijmaz saeh lo. Gou raen gig geizgvaiq, hix caenx hwnjbae yawj nauhyied.

O, laxlawz dwg daegnuengx naj

saekheu ndeu, ngunh laemx lo, gyoengqvunz youq henz ganggangj vixvix. Daihgya cungj laihaeuz daeg-nuengx neix aiq dwg boux vunzyaeuh ndeu, siengj hawj bouxvunz simndei bae bang de seiz ngaek vunz aeu cienz, ndigah bouxboux cij dwg youq henz yawjyawj, mbouj gamj iet fwngz bae bang. Gou sijsaeq yawjyawj, raen mbouj lumj daihgya yienghneix siengj bw. Gou nyaenx mbouj ndaej bae lumh naj de, de cungj mbouj singj. Daxmeh gou sikhaek aeu rib mehfwnz mbaengq cuengqgyang laj ndaeng de. Mbouj geij nanz, de singj gvaqdaej lo, de menhmenh naengh hwnjdaej, yawjyawj seiqhenz, youh yawjyawj dou, yienzhaeuh doiq daxmeh gangj "docih, docih". Doeklaeng dou cij rox, daegnuengx neix dwg vunz lajmbanj, de dwg caeuq daxmeh daej ndaw singz yawj daxboh, daxboh de youq ndaw singz dajgoeng. Mbouj rox seizlawz, cienzbau caeuq soujgih daxmeh cungj deng caeg bae lo. Daxmeh de gig simgip, dauqcawq bae

ra vunz lwnh hawj daxboh. Daegnuengx neix youh iek youh hozhawq, ndigah, couh ngunh laemx lo. Caj daxmeh de daej le, dou couh cuengqsim sanq bae lo.

Daxmeh gou bae cawx cibiug seiz, raen cienzbau mbouj raen lo. "Dwg mbouj dwg cuengq youq ndaw sieng cang buhvaq ne?" Gou simgip dwk bang daxmeh fan sieng ra, hoeng, baenzlawz ra hix ra mbouj raen. Daxmeh ngeiz naeuz: "Dwg mbouj dwg haxbaenh..." Gou hujfodfod dwk naeuz: "Ndae ha, duz fangz neix, cij geij bi lwg couh hag yaeuh vunz la, caen dwgcaengz!" Ndaw cienzbau cang miz haujlai cienz, dwg dou yaek bae lijyouz yungh, seizneix baenzlawz guh ha? Gou caeuq daxmeh simgip dwk bae cam vunz, bae ra, hoeng, cungj mbouj raen daegnuengx haenx lo. Gou heiqlietniet dwk naengh youq gwnz eij, cibfaen nanzgvaq. Cingq youq seizneix, gou raen daegnuengx haenx lo, gou sikhaek cung hwnjbae, gaemdawz lingxbuh de, rongx naeuz:

"Mwngz duz yaeuh vunz neix, dawz cienzbau duh gou daej!" De sing iq naeuz: "Sou byaij bae seiz, gou yawjraen gwnz dieg miz aen cienzbau ndeu, couh rox dwg duh sou, gou hix cingq ra sou ne!" Gangj dwk, de daj ndaw rungj dawz ok aen cienzbau ndeu, gou dawz gvaqdaej baez yawj, cingq dwg aen cienzbau duh dou. Seizneix, daxmeh de hix hanh lae hanh roenx buet gvaqdaej, sing get naeuz: "Lwg ha, mwngz buet ndaej baenz vaiq, gou cungj gyaep mbouj hwnj lo." Daxmeh gou doiq daxmeh daegnuengx neix naeuz: "Daiq doiq mbouj hwnj sou lo, dou loenggvaiq daeglwg mwngz lo." Daxmeh daeg-nuengx riu naeuz: "Mbouj youqgaenj, dwg sou gouq daeglwg gou, gou docih mwngz cij dwg ne!" Gangj dwk daihgya cungj riu lo.

Dwg ha, youq lajbiengz miz baenzlai vunz simndei, cijaeu dox-saenq lai di, couh ndaej hawj aen seiqgyaiq neix engqgya gyaunde.

(指导老师:覃红梅)

Bang Duzvaiz Swiq Ndang

给牛洗澡

贵港市覃塘区蒙公乡高占小学 黄茂晨

Ranz gou miz duz vaiz hung ndeu, duzvaiz neix naengnoh ndaemndat raeuzrwd, aenndang bizbwd, doiq da ndongqndat, gou moix baez yawjraen de, couh siengj hwnj baez daih' it bang de swiq ndang.


Ngoenzhaenx, gou yien duz-vaiz bae ndaw dah. Duzvaiz baez yawjraen raemx couh angqvauvau, gip ndaej yaek diuq roengz raemx bae, yienghneix, bienqbaenz duz-vaiz rag gou lo. Duzvaiz baez bongh, diuq roengz ndaw dah bae lo. Raemxdah sinz hwnj gig sang, gou cungj deng sinz dumz lo. Duzvaiz yawjyawj gou, lumjbaenz doiq gou gangj: "Doiq mbouj hwnj." Duzvaiz rouh youq ndaw raemx, aen'gyaeu nyex bae nyex dauq, mbiengj ndang ndeu fouz youq gwnz raemx, miz duzbuengx daej haeb de, de cungj mbouj swt, cix dwg ngauzngauz gyauej, baetbaet diuzrieng. Gou yawjraen miz lwed hoengz lae okdaej, miz di sim'in lo, couh roengz raemx bae bang de bek duzbuengx dai bae, lij gonh

di raemx hwnjbae dongj dieg sieng, raen aenndang de uq lai, gou youh beng nywj daej cat ndang de. Duzvaiz caih gou bang de swiq ndang, di ndeu hix mbouj doengh, lij iet gyauej gvaqdaej hawj gou bang de ngvaij humz dem.

Gou lij caeuq duzvaiz guh-caemz, gou youq henz dah ciemz nywj vut roengz dah bae, duzvaiz youq ndaw dah itmienh caemx ndang itmienh gwn nywj, dou saj ndaej geijlai angq ha!

Daengngoengz doek roengz baihsae bae lo, ronghndwen venj youq henz mbwn lo, gou rag duzvaiz, it loh ciengqgo byaij baema.

(指导老师:韦江萍)



Dah'iq Gyaunde

美丽的小河

贵港市覃塘区蒙公乡高占小学四年级 覃星钊



Diuz dah'iq mbanjranz gou, raemx sawdikdik, yawj ndaej raen bya' iq youq ndaw raemx youz bae youz dauq. Henz dah ndaem miz haujlai gomak caeuq byaekheu. Ciengzseiz miz haujlai vunz daengz neix youz caeuq langh vaiz. Mehmbwk mbanj gou cungj gyaep daej henz dah saeg buhvaq caeuq swiq byaek.

Gyanghaet, gou daejdaengz henz dah, couh yawjraen haujlai mehmbwk daej saeg buhvaq lo, gyoengqde itmienh saeg buhvaq itmienh doxgangj, seiz mbouj seiz fwt riuha, gij sing gig angqyangz, lumj aenhaw nei nauhyied raixcaix. Vunzlaux hix yien duzvaiz daej diegnywj henz dah langh vaiz lo. Gyoengq vunzlaux lij caeuq gyoengq mehmbwk eu fwen: "Raemxdah sawdikdik, mehmbwk saeg buhvaq; rumnywj heuswdswd, daxgoeng langh duzvaiz; buhvaq saeg

hauswk, duzvaiz gwn bizbwd."

Daengngoengz okdaej lo, raemx dah wenjmyagmyag. Lwngyez daej henz dah ep bya, yaep ndeu couh ep ndaej geij duz bya bizbwd, gyoengq lwngyez angq dwk fwngz vad din dik, gyoengqde siengj roengz dah bae youz raemx, hoeng raen miz gaiq baiz ndeu laeb youq henz dah, gwnz baiz sij "raemxdah laeg mbouj ndaej roengz dah youzraemx", gyoengqde cijnde daz geij duz bya bizbwd haenx baema lo.

Seizneix, henz dah'iq byaekheu maj ndaej heuswdswd; gwnz gomak venj miz haujlai mak, diuz dah'iq neix bienq ndaej engq gyaunde lo.

Diuz dah'iq mbanjranz gou geijlai gyaunde ha! Diuz dah neix mboujdanh hawj dou saeg buhvaq swiq byaek, lij ndaej dwk naz rwd reih. Gou gyaep diuz dah'iq mbanj-ranz!

(指导老师:韦江萍)